

第十四册

河水九
光緒二十四年至宣統三年

再續行水金鑑

丹
隱署
簽



981026
1377
14

再續行水金鑑卷第一百三十八

河水編年八十五

光緒二十四年正月初七日張汝梅奏爲籌堵利津縣扈家灘漫口謹陳現辦情形並請截留款項以濟工需事竊臣前因扈家灘等處凌汛漫口請將督辦營員暫緩參處勒限堵合於光緒二十三年十二月初三日具奏欽奉初九日諭旨著照所請暫緩參處勒限一箇月趕緊堵合毋得遲誤等因欽此仰見朝廷俯鑒下情莫名欽感遵卽飛飭候補道丁達意直隸候補知府勞乃寬督飭該汛防營欽遵辦理伏查利津迤下大隄之外有臨河民修圈埝一道計長九百丈通名扈家灘圈埝之內有馬莊姜莊扈家灘三村此次凌汛由臨河民埝漫口埝內水不能容致將附近姜莊馬莊兩處大隄沖決臣前奏所稱扈家灘大隄係就地方通名而言實則水從民埝而入其大隄兩處漫口則在姜莊馬莊也茲據丁達意勞乃寬會稟姜莊口門先因冰塊層結壅塞斷流本月初間天氣稍暖冰開水刷測量已寬至三十丈水深一丈一二尺至一丈四五尺不等馬莊口門逐漸刷寬至三十一丈水深一丈三四尺至一丈六七尺不等約套溜六分有奇復查民埝口門亦寬三十餘丈水深一丈三四尺至二丈七八尺不等馬莊溜勢已成入袖且大隄內外皆係積水質土難求無可施工民埝臨河一面尙有灘土可取且濱臨大河河形順直若先將民埝堵合則可期逼溜歸入正河大隄口門旣無來源堵合較易爲力現已將各處裏頭盤築穩固一面趕辦正雜料物催趲堵合查堵口以椿料檣麻爲大宗刻下冰凍河

封舟不能行笨重之物陸運難以求速且民埏以外一片泥淖不能用車運土僅恃擡筐亦恐緩不濟急深慮勒限屆滿未能如期歲事惟既欽奉諭旨趕緊堵合何敢不力任其難現已飭河防局暨該道等派員分投購買稽料安設正雜料廠雇覓捆廂船隻遴派文武掌壩員弁一俟料物齊備卽行動工所有應用工需核實估計約需銀七萬兩山東司道各庫均屬入不敷出無可籌措查上年修培隄埝暨堵合西韓家漫口先後請款二十一萬兩均係截留京餉奉旨允准欽遵在案合無仰懇天恩俯准照案截留光緒二十四年京餉銀七萬兩俾得趕緊興辦臣當督率丁達意等嚴飭撙節動支不准稍涉糜費以重帑項 奉硃批戶部議奏諭摺彙存

二月初四日張汝梅奏爲利津縣廬家灘漫口堵築合龍恭摺由驛馳陳事竊臣前奏廬家灘凌汛漫口於光緒二十三年十二月初九日欽奉諭旨勒限一個月趕緊堵合等因欽此嗣因正河封凍椿料陸運維艱恐未能依限堵合復經臣於十二月二十六日專摺奏明並請截留款項一面飛催存記補用道丁達意直隸候補知府勞乃寬嚴督在工文武各員設法搶堵毋許稍涉延誤旋據該道等稟報已於十二月二十一日動工時值天寒地凍水澤腹堅運料則全資車輛甚費周章取土則灘面堅凝難施椎鑿且推挽捆廂船隻須敲開一二尺厚之冰用繩牽拽尤爲艱苦異常該道等督率員弁勇夫晝夜趕辦武定府知府尙其亨以事關民瘼亦駐工督辦車輛激勵民夫通力合作迨民埏進占之後東壩洶深至四丈有餘西壩雖不及三丈而底係稀淤追壓難於穩實口門奪溜至六分挾冰而流旣猛且急正月十三日全河凍解大塊冰凌順流疾下致將東壩捆廂船損壞門占幾至漂失各弁勇拚

命搶壓幸得保全迨金門收窄外水擡高撞擊洶情極危險至正月二十一日始得盤壓穩固於二十二日挂纜合龍門占已到底忽西壩金門占陡墊四丈有餘龍門占亦牽動欹側翻花趕緊放價跑買土料拋擲麻袋蒲包竭兩晝夜之力至二十四日辰刻始行閉氣其姜莊大隄口門先於正月二十日堵合馬莊口門至民埝合龍之後併力趕辦亦於二十七日堵合斷流現全溜均歸正河民田涸復可以無誤春耕伏查上年小沙灘凌汛漫口時值春融凍解尙易爲力此次工程當凌汛初屆之時全河凍阻船不能行椿料俱不應手在事員弁因欽奉諭旨勒限無不殫精竭力奮迅圖功月餘以來奔馳泥淖之中往來冰雪之上連宵達旦廢寢冒寒實屬勤勞備至至扈家灘民埝民間自行修築佔地太多逼束河身僅百三十餘丈本應廢而不堵因馬莊姜莊大隄口門水勢入袖無可措手不得不先從民埝施工今馬莊姜莊大功已蒞應飭將善後工程修培堅厚以禦大汛其扈家灘民埝仍應棄而不守合併陳明

論摺彙存

是月十四日張汝梅奏報銷光緒二十二年堵合利津縣趙家菜園漫口共需銀三萬四千一百三十六兩零論摺彙存

是月二十三日張汝梅奏報銷光緒二十年堵合利津縣呂家窪漫口共需銀六萬六千五百五十六兩零論摺彙存

三月十三日張汝梅奏爲山東黃河現由北嶺迤下絲網口入海勢甚通暢舊河已見淤塞擬將舊河截斷以免分行力弱謹將籌辦情形恭摺具陳事竊維黃河以入海爲歸宿必海口通暢水得遂其就

下之性方免氾濫爲災查東省黃河自咸豐五年銅瓦廂決口水入大清河由利津縣鐵門關肅神廟以下入海其始河面雖窄河身尙順故黃水猶能容納其後逐年淤澱河身日高至光緒八九年以後幾於無歲不決上游愈決則下游愈淤海口亦因之高仰迨光緒十六年韓家垣決口前撫臣張曜遂奏請建築攔黃大壩將舊河截斷以韓家垣爲入海之路行之數年韓家垣又復淤澱至光緒二十一年呂家窪決口大溜旁洩韓家垣積淤日甚淺可膠舟二十三年前撫臣李秉衡於是奏明開挖陳莊新河至李家阜以入肅神廟舊河之舉乃挑工未畢偏值是年十一月凌水暴漲灌入新河不能施工致宣洩仍復不暢二十三年北嶺西灘兩處漫決水由絲網口入海正河幾致斷流嗣後西灘漸次淤塞大溜全注北嶺復由北嶺倒漾至西灘漫口分入正河涓涓細流今已全行堙塞此現在舊河淤澱水已改道之情形也伏查山東黃河受病不止一端而目前急則治標先以流注海口爲第一要務臣前奏調開缺南陽鎮總兵崔廷桂荷蒙恩允該員於咸豐年間南河豐工卽身親其役後官河南歷辦大工於修防最爲熟悉該員到東後臣派令總理修防事宜先自中游長清縣起自利津海口周歷履勘茲據稟稱由北嶺口門至絲網口入海計七十餘里均已刷成河身其勢極順現擬自北岸薄莊起至南岸北嶺子止修築新隄一道計長四百二十丈將舊河截斷並將迤下西灘旱口堵塞將舊河南隄改作新河北隄口岸則從十六戶迤下起至絲網口迤上之二道嶺止計長七千丈修建南隄一道使河身有所收束得以逼水刷沙尾閘可期通暢北嶺之東壩基卽改挑水壩廂修護埽以托溜勢惟十六戶河面甚窄正當頂衝應將該莊遷徙等情稟請核奏前來臣查水性就下其勢使然自上年

五月北嶺決口大溜由絲網口入海勢極通順前撫臣李秉衡於上年九月奏請留爲入海之路欽奉硃批著照議妥辦等因欽此欽遵在案惟彼時正河尚有微流故復請間段挑挖留爲分洩之路今則正河自北嶺以下淤高至二三尺若復逐段挑挖自北嶺經陳莊至李家阜三十餘里工費繁多既難籌此鉅款且水分則溜緩力弱易至停淤自以將舊河截斷使全溜專由北嶺入海爲是李秉衡原奏謂將來有無變遷隨時因勢利導蓋亦未嘗不慮及此耳至十六戶在北嶺迤上中隔南嶺一莊已多被水坍塌十六戶對岸爲鹽窩河面寬僅一百餘丈該處河形本自南而北至鹽窩屈曲東行正當坐灣頂衝加以河面逼窄奇險迭出每年鹽窩一處搶險動費數萬金仍無把握設有疏失則北岸利津需化均受其害茲擬勸諭十六戶居民擇地遷徙將鹽窩拋護甌石逼溜東行使河身逐漸展寬則鹽窩險工可以漸臻鞏固以下孟莊呂家窪等處均改在背河逐年防汛料物亦可節省辦法頗爲妥協臣復稽諸衆論詢謀僉同已飭趁桃汛以前趕緊興辦應需兩岸築隄經費攢節估計約需銀六萬餘兩當茲庫帑支絀不敢請撥部款卽飭賑撫局設法先行籌撥濟用以工代賑總期工歸實用款不虛糜除飭武定府督同利津縣另覓海灘淤地趕辦遷民事宜並飭崔廷桂督率工員將該處工程妥速辦理外所有籌辦山東黃河請改由絲網口入海緣由理合恭摺具奏 硃批著照所請論摺彙存

是月三十日張汝梅奏爲報銷光緒二十二年開挖利津縣陳莊新河並添築格隄動用工需銀兩事竊照光緒二十二年利津縣趙家菜園等處漫溢成口以致韓家垣正河淤淺在於韓家垣迤上陳莊舊欄黃壩迤東開挖新河二十里並添築格隄一道計自二十二年九月十六日興工挑築至二十三

年正月二十一日一律完竣所有查勘辦理情形均經前升任撫臣李秉衡奏報在案茲據河防局司道詳稱督飭承辦各員將用過土方礮工價值逐加確核共需銀四萬一千一百九十七兩零俱係實用實銷並無扣存成平論摺彙存

四月初六日張汝梅奏報銷光緒二十二年堵合利津縣西韓家民埝漫口共需堵口經費銀二十六萬五千二百六十六兩零俱係實用實銷並無扣存成平論摺彙存

五月初一日任道鎔奏爲時近庚伏兩岸埽壩及上南廳要工一律修守平穩臣赴工督防大汛起程日期事竊照本年入夏以來雨水甚勤黃河兩岸八廳水勢陸續見長幸皆旋長旋消各廳臨黃埽壩自經春廂以後間有被溜刷墊者均經兩道督飭該廳營等隨時酌度廂拋現俱一律穩固而上南廳榮澤汛十一堡本係舊日險工近年河溜外移久經淤閉本年自春徂夏溜勢逐漸南圍致將舊埽匯出朽底紛紛潰塌當經督飭該廳相機搶廂所幸料物業已先期購運得以無誤工需現在水勢略見循順仍飭該廳將舊埽之稍有根柢者擇要加廂其朽腐不堪者酌補新埽並於扼要處所加拋碎石以資蓄護挑托迤下鄭上汛胡家屯等處亦因溜勢南圍趨刷埽壩時見形墊均已分別廂拋穩定惟瞬屆庚伏河水長落靡常工程夷險莫定臣應卽赴工督飭以昭慎重茲擬於五月二十二日自省帶印起程沿隄溯行上游周歷各工並駐劄鄭中廳適中之處上下策應督率道廳員弁實心實力認真修防斷不容一處稍涉疏懈論摺彙存

是月丁巳（初五日）以直隸總督王文韶爲戶部尚書實授榮祿爲直隸總督充北洋通商大臣清德宗

六月二十一日劉樹堂奏爲河內縣沁河隄身殘缺亟須修補以防大汛現飭確切勘估援案動款興辦事竊照懷慶府屬河內武陟兩縣經管沁河一道互長百數十里隄身本極單薄而河內境內隄身較武陟爲倍長廂埽多至三百四五十段且地勢高仰河不成槽溜無定向每遇山水陡發往往疊出險工雖經光緒十六年奏請撥款興辦然爲時已逾八年且所修工段本係擇要並未全修年來工段甚多當盛漲時水去隄頂僅止數寸沿河居民異常驚駭非將隄工一律增高培厚防守殊無把握茲飭彰衛懷道岑春榮督同河內縣知縣愛仁周歷隄段逐細履勘擇其要中之要按段擇節勘估如南岸之天師廟張莊尙香馮莊西張北岸之蔣村內都司良仕白馬溝南張茹等計工二十四段而天師廟一帶情形尤屬危險調查十六年修過工程卷宗悉心參考與現在應修要工相同間有前次曾經修補近因山水沖刷仍形單薄不得不培補加廂經臣一再核減計估得土方礮坎各工銀三千四百餘兩委係力求撙節毫無浮冒由彰衛懷道岑春榮開具估摺稟經批司覆核俱係緊要工程應動支正雜錢糧辦理茲據布政使額勒精額詳請奏明撥款興修前來臣查河內縣沁河隄身綿長每屆伏秋大汛異常危險春間臣赴河北杏閣營伍順道前往履勘隄身實多殘缺洵爲刻不可緩之工溯查光緒十六年經前護理河南巡撫臣廖壽豐會同前河東河道總督臣許振禕具奏撥款興辦奉硃批着照所請該部知道欽此欽遵在案現在該工緊要與光緒十六年間情形無異相應懇恩准其撥款興辦以資捍衛 奉硃批戶部議奏 諭摺彙存

七月初三日任道鎔奏爲豫省黃河伏汛安攔現交秋汛臣仍駐工督防事竊臣前將時近庚伏兩岸埽壩及上南應要工一律修守平穩並臣赴工督防大汛起程日期各緣由於五月二十二日繕摺具奏在案臣拜摺後卽於是日起程沿隄查勘工程至鄭中廳工次駐劄旋據陝州申報萬錦灘黃河自五月二十七至六月十一日五次陡長水一丈八尺又據黃沁廳呈報武陟沁河四次陡長水一丈六尺餘寸加以上游伊洛瀍澗通貫各路之水匯流下注浩瀚異常兩岸各廳無不紛紛報長水勢大於往年臨黃埽壩均形喫重如南岸之上南鄭中中河北岸之祥河下北等廳尤爲緊要所幸迎溜各工均經先期廂拋預爲盤壓高整堪資抵禦偶遇刷墊卑矮又賴料石充盈人夫齊集得以應手跟加隨時搶辦穩定藉保無虞前於六月二十日節交立秋伏汛已過兩岸八廳一律保護安瀾惟交秋以後汛水湧注淘底搜根且汛期爲日甚長防秋重於防伏臣仍親駐廵工最要之鄭中廳工次上下策應督率道廳營汛審工儲料加慎籌防凡遇應辦工程當用則用當省則省務求核實力戒鋪張論摺彙存是月初六日張汝梅奏爲黃河伏汛盛漲異常上中兩游疊見漫溢謹陳大概情形並自請議處事（前略）本年六月初五日准陝甘督臣陶模電稱蘭省西路大雨河水驟長丈許省城外各橋梁衝斷知照前來又疊准河東河道總督任道鎔連次咨報陝州萬錦灘暨武陟沁河水勢陡長續漲至一丈有餘及二丈餘不等請一體防護各等因上流來源過旺東省河防處處岌岌可危當卽飛飭上中下三游總辦督飭防汛營委各員寬備物料多集勇夫晝夜防護遇有險工竭力搶廂去後旋值陰雨連綿各路山水暴發下注據各該營委紛紛稟報連日水勢迭漲有增無減盈隄拍岸洶湧異常實有防不勝

防之勢又因雨水過多搶修各險土料用罄幾無乾土可尋臣聞報之餘萬分焦急逆計如此情形難期平安惟有羽檄紛馳嚴飭在工各員拚命搶護力與水爭茲於六月二十二日先據總辦中游河工道員丁達意及承防營委先後稟報歷城南岸楊史道口民埵於二十一日夜間漫溢未奪大溜復據運河道羅錦文電稟黃河上游南岸黑虎廟漫溢溜由壽張鄆城兩縣地界穿運河東洩仍入黃河未據該營稟報正在飭查間復據壽張縣知縣莊洪烈稟稱縣境楊家井臨安隄漫溢平地水深盈丈被淹四百餘莊懇即派員散放急賑等情亦未據該營委稟報當因漫水浩大道路不通臣即飭賑撫局撥款購買乾糧席片派員分赴各被水地方查放急賑一面選派差弁前赴黑虎廟楊家井查看漫溢情形營委下落稟報核辦伏念山東河防著名棘手河身淤墊日高又值陝甘上流洪水下注加以連旬霪雨山水漲發同時並注譬如水多孟小勢難杜其旁決橫流惟該總辦營委各員職有專司責無旁貸容即查明確實情形另行奏參臣奉職無狀權此奇災督率無方咎有應得相應先行誨旨將臣交部議處 又奏再正繕摺間接據承防濟陽北岸下段隄工委員候補通判張芝祥管帶精健前營補用游擊葉雲升稟稱濟陽縣屬北岸之桑家渡大隄又復出險趕緊竭力搶護一時大溜擁來水高於隄搶不及搶於二十五日申刻漫溢出槽大溜灌入圈隄即刻漲滿漫溢成口刷寬至十五六丈深二丈餘計分溜十分之四旋又據中游總辦道員丁達意稟報東阿東平肥城長清各州縣境內民埵本屬卑薄水過埵頂漫溢多處大隄百餘里處處出險該提調營委等上下奔馳百計防護東阿境內大隄王家廟前於二十四日未刻漫溢十餘丈現計漫溢多處而河水仍不見消實深焦灼等語除由

臣嚴飭各屬趕速盤做裹頭勿任刷寬以便堵合其未經失事之處務竭人力晝夜搶護毋稍鬆勁一面飭賑撫局添派委員分投各州縣散放急賑外查本年黃河上游水之大爲數十年所未見屢准東河總督臣任道鎔迭次咨報陝州萬錦灘暨武陟沁河自五月中下旬起至本月十七八等日陸續增漲前後接算幾及三丈山東地處下游河窄工長水勢自上游排倒而下至罹此災雖屬半由定數而事關國計民生在工各員未能預防周密實難辭咎容卽由臣查明另摺奏參以示懲儆諭摺彙存已（七月初六日）諭張汝梅奏黃河伏汛盛漲上中兩游漫溢並濟陽縣屬之桑家渡等處先後漫溢自請議處各摺片本年六月二十一日山東黃河上游南岸黑虎廟漫溢溜由壽張鄆城兩縣地界穿運河東洩壽張縣楊家井臨安隄漫溢平地水深盈丈被淹四百餘莊中游歷城南岸楊史道口民踰漫溢濟陽縣屬之桑家渡大隄漫溢成口刷寬十五六丈深二丈餘東阿境內王家廟漫溢十餘丈其餘東阿東平肥城長清各境內亦漫溢多處此次山東黃河上中兩游迭報失事總辦河工道員丁達意等未能先事預防著該撫查明確切情形另行奏參張汝梅著交部議處現在秋汛方長仍著該撫督飭在事各員認真防護毋得再有疏虞清德宗實錄

是月乙丑（十四日）諭現在東河在山東境內者已隸山東巡撫管轄祇河南河工由河督專辦今昔情形確有不同著將東河總督裁撤東河總督應辦事宜卽歸併河南巡撫兼辦東華續錄

是月十五日張汝梅奏爲查明黃河工段漫溢詳細情形並將疏於防範之總辦提調營委各員分別參處事據上游總辦堯沂曹濟道沈守廉防汛委員候補知縣彭錫瑞管帶河防營候補遊擊劉芳池

先後稟稱濮州之八孔橋譚家莊民埵先後漫溢水勢洶湧溜向東趨大隄甚屬喫緊張樓唐廟徐家橋等處連出漏眼均隨時竭力堵塞奈水勢過大漫逾隄頂當卽會同壽張知縣莊洪烈鄆城知縣馬丙炎督飭勇夫加築子埵至三十里之長以資抵禦而水勢又復擡高子埵隨築隨漫六月二十一日子刻大雨傾盆北風捲溜水愈洶湧竟將張家樓迤北之楊莊大隄漫溢昏黑之際人力難施頃刻間冲刷至二三十丈溜勢直趨壽張集梁山一帶等語查楊莊在黑虎廟迤西連河道雜錦文電稱南岸黑虎廟漫溢其水穿運東洩仍入黃河卽指此處此該處大隄漫溢搶護不及之詳細情形也又據中游總辦存記補用道丁達意管帶河定前營准補膠州協副將夏錫純先後稟稱本年汛水之大爲歷年所未經因東河境內王家坡民埵失事水至香山隄根頃刻高與埵平疊出漏洞數處急用物堵塞一面併力搶加子埵忽迤上王家廟大隄出險危在呼吸急速奔往搶護間隄頂陡然蟄陷溜高於隄數尺其時各勇併力搶堵奮不顧身致有勇丁二名隨水漂沒人力無從展施於六月二十四日未刻漫溢立時冲刷二十餘丈漸刷至四十餘丈水由荏平一帶經過流行平緩約分溜十分之一將來水落歸槽似尙不難堵合等語此王家廟隄工漫溢搶護不及之詳細情形也又據道員丁達意及歷章南岸承防委員候補知縣吳金鉅管帶河定左右營補用都司龔廷魁原續稟稱該防險工林立如王家廟梨行小河灘胡家岸等處大溜頂沖巨險疊出均經督飭勇夫分赴搶護幸均平穩惟水漲出槽盈隄拍岸復經集夫搶築子埵以資抵禦忽於六月二十日卯時楊史道口出有漏眼併力堵塞幸已搶住而水勢繼長增高下晚胡家岸下段又出巨險該營委等奔馳搶護間楊史道口水逾隄頂於是

日戌刻漫溢失事時值昏夜風雨交作人力難施冲刷約十餘丈連日盤做裹頭乃河水有增無減迤下相距百數十丈埵身隨又坍塌竟至刷寬一百餘丈奪溜六七分其水由郭家寨舊隄缺口而下經高苑博興樂安一帶入海其上口現已挂淤將來堵塞較易此楊史道口民埵漫溢後上口挂淤下段坍塌刷寬之詳細情形也又據道員丁達意及承防濟陽北岸委員候補通判張芝祥管帶精健前營補用遊擊葉雲升原稟稱該防桑家渡迤上大王廟因溜勢洶湧舊隄新加後戩會同濟陽知縣邢壽慶調集民夫一千餘人連夜趕成無如土性純沙見水即潰正在隄前做埽挂柳晝夜竭力搶護六月二十五日西南風大作驚濤駭浪排倒而來登時水過隄頂人力難施竟於是日申刻由大王廟迤東隄段漫溢出槽冲刷八九丈大溜灌入圈隄旋即漲滿又復漫溢成口刷寬十五六丈深二丈餘計奪溜十分之四此日漫水逐漸鋪寬由惠民濱州霑化等境村莊經徒駭河直趨泇河入海等語此桑家渡大隄漫溢之詳細情形也復經臣分飭差弁前往各漫口查覆所稟情形大略相同惟壽張縣稟報該境北岸楊家井臨黃隄漫溢係屬民守之埵竟沂道沈守廉繼稟情形亦相符合前次上游營委稟報遲延係因漫水淹路步遞繞越而行致稽日時尙非有心遲誤伏查本年上中兩游伏汛期內失事處所各該總辦營委等所稟均稱盛張異常水過隄頂人力難施雖係實在情形而官守所在責有攸歸究屬疏於防範若不照例懲處不足以示必罰而儆將來相應請旨將承防楊莊之營官補用遊擊劉芳池委員同知銜候補知縣彭錫瑞承防王家廟之營官總兵銜准補膠州協副將夏錫純委員候補知縣左延齡分防委員試用典史林介芹承防楊史道口之營官留東補用都司龔廷魁委員直

隸州用候補知縣吳金鉅分防委員候補縣丞戴奎光承防桑家渡之營官留東儘先補用遊擊葉雲升四品銜直隸州用候補通判張芝祥分防委員候補縣丞袁作楫一併革職留工夏錫純免開實缺均責令迅籌堵合以觀後效其上游總辦堯沂曹濟道沈守廉總辦二品頂戴按察使銜存記補用道丁達意上游提調曹州府知府邵承照中游提調候補知府吳煜一併交部議處仍責令督率營委趕將漫溢處所相機設法堵築合龍如能奮勉再行奏請恩施此外沿河各州縣民埝如濮州之八孔橋譚家莊舊城里壽張之楊家井東阿之王家坡平陰之胡溪渡翟莊生家莊肥城之潘家莊長清之郭家莊等處據報先後漫溢因係民修民守例不開參被淹田廬均經臣飭賑撫局委員分往查勘與官守隄埝漫溢各處一體散放急賑其被災輕重由各州縣查報應蠲緩錢糧歸入本年秋災案內辦理又奏再河南南陽鎮總兵崔廷桂前經臣奏調來東委令總理三游河工節制河防營事宜並咨調東河候補通判馬春祺東河祥河協守備朱彥隨同該鎮當差以資熟手該鎮到工以來通籌全局相度機宜勞瘁不辭頗爲得力以治河先期尾閘通暢且山東河工最難治之處首推下游歷年多有失事遂令親駐利津之鹽窩督飭疏濬南北嶺入海口門修隄束水冀收束水攻沙導河入海之效本年漫溢處所轉在上中兩游實因來源過旺河身不能容納以致氾濫四出其理易明該鎮遠駐下游力保險要日夜奔馳搶護幸能全無失事勢難兼顧上中游工段惟既係總理三游臣不敢曲爲解免應否請旨將開缺河南南陽鎮總兵崔廷桂一併交部議處出自容裁 諭摺疊存 丙寅（七月十五日）諭張汝梅奏查明黃河工段漫溢詳細情形請將在事各員分別參處一摺本年六月間山東上中兩游

伏汎漫溢前經諭令該撫查明具奏茲據奏明詳細情形此次失事處所雖據稱盛漲異常人力難施該管員弁究屬疏於防範承防分防之營官委員補用遊擊劉芳池等著一併革職留工勒令迅籌堵合以觀後效上游總辦堯沂曹濟道沈守廉等著一併交部議處仍責令督率營委趕將漫溢處所設法堵合此外漫溢民趁著一併迅籌修築並將被淹田廬查明分別賑撫另片奏總兵崔廷桂請一併議處等語崔廷桂遠駐下游勢難兼顧惟既係總理亦難辭咎著一併議處該部知道東華續錄

是月丁卯(十六日)諭電寄劉樹堂河南河工已歸併巡撫兼辦劉樹堂責無旁貸著督率道廳各員將防汛事宜認真籌辦毋稍疏虞仍將接辦情形先行電奏清德宗實錄

是日諭侍講學士濟澂奏山東黃河漫溢敬陳管見一摺稱山東河身逼窄南北濶口寬不及百丈黃流翕受諸水勢不能容近年上下游漫溢決口以中流濶口爲束縛逼緊之故惟有因河之寬窄審勢之高下窄者量爲寬濶以分水勢寬者仍其舊隄以節經費請飭籌辦等語著張汝梅體察情形督飭道廳認真辦理剋期合龍以衛民生而弭水患儻在事員弁辦工不力卽著擇尤從嚴參奏毋稍徇延

清德宗實錄

是月二十九日任道鎔奏爲交秋以後黃河接續異漲兩岸埽壩墊場均經竭力搶護平穩現近白露仍飭道廳加慎修防臣擬暫行回省事查本年伏汎期內黃河來源旣勤且旺各廳誌椿積存長水較之近年盛漲之日大逾四五尺不等詎意前水尙未暢消甫交立秋陝州萬錦灘黃河及武陟沁河復同時暴漲匯流下注浩瀚奔騰各廳水勢無不拍岸盈隄加以大雨兼旬狂風鼓浪以致兩岸出水五

尺之埽段紛紛墊入水石壩亦旋拋旋坍幾致措手不及更有上南多年淤閉之工復將舊埽朽底匯出場及隄根不得不添坐埽其木料輒石已先期添運臣督率道廳營汛於風雨泥淖之中晝夜分投搶辦竭十餘日之力始得化險爲夷至交秋前後水勢漸消尙復旋消旋長來源仍旺工作未敢稍停復將近溜緊要各埽壩一律跟盤穩定河勢亦見順平茲已節近白露大致已無可慮此次黃河水勢異常浩大實爲歷年所未有臣與通工文武員弁無不目擊心駭而豫省南北兩岸尙能保護平安此皆仰賴聖主至誠感格河神默佑初非人力所能至此現距霜清尙有五旬仍飭兩道督率廳營汛弁隨時嚴密防範相機修守臣擬拜摺後卽暫行回省諭摺謹存

八月壬午（初一日）諭翰林院代奏桂坵請減河工歲修專款創辦海軍一摺河工專款疊諭覈減據稱實銷不及二三成等語是否屬實著劉樹堂認省稽覈能否力加撙節添撥海軍之用清德宗實錄是日諭軍機大臣等王錫蕃奏山東現辦河工請酌用西法挖泥船及打椿機器以資補救一摺所奏能否施行著張汝梅察看情形迅速具奏原摺鈔給閱看將此諭令知之東華續錄

是月初七日張汝梅奏爲節逾白露黃河水勢漸落謹將籌款堵築上中游漫口情形恭摺具陳事竊臣前因伏汛盛漲險工疊出上游壽張縣屬南岸之楊莊中游東阿縣屬北岸之王家廟歷城縣屬南岸之楊史道口濟陽縣屬北岸之桑家渡等處隄埽先後漫溢未能先事預防自請交部議處並將工員分別參處於六月二十八七月初七等日專摺奏報恭閱電抄光緒二十四年七月初六日奉上諭現在秋水方長著該撫督飭在事各員認真防護毋得再有疏虞餘著照所議辦理等因欽此又於七

月十五日奉諭仍責令督飭營委趕將漫口處所設法堵築此外漫溢之民捻著一併迅籌修堵等因欽此伏查本年汛水之大雨水之多來源之旺爲歷年所未有黃河水勢自七月十五日以後雨止天晴始行停漲二十三日節交白露逐漸消落三游完善各段險工如上游之賈莊影塘廖橋張樓唐廟姜莊柳園徐家橋黑虎廟黃花寺雲家垓雙合嶺大辛莊中游之趙莊張村于莊少河灘胡家岸霍家溜朱家圈豆腐窩五里堡邱家岸史家塢李家岸范家鋪葛家店郭家渡河套圈段家灘韓家道口郭家紙坊下游之邵家崔家毛家賈家鹽窩王莊宮家北鎮蝎子灣劉春家白龍灣馬張家宋家方家莊圈董家范家莊張家莊西韓家大道王家碁家夾河打魚張家趙家菜園各報奇險環生隄埽墊陷均經搶護平穩幸保無虞第恐各處漫口愈刷愈寬亦經上中兩游總辦督同營委各將裹頭盤築堅實連日勘估籌堵冀漫口早堵一日民生即早安一日該總辦等深知工關緊要力圖補救原報濮州境內之八孔橋譚家莊舊城里壽張縣境內之楊家井東阿縣境內之王家坡平陰縣境內之胡溪渡翟莊生家莊肥城縣境內之潘家莊長清縣境內之郭家莊等處民埝漫溢成口俱係民守民修半多水落掛淤仍令照舊修堵分別量予津貼以工代賑而恤民力其楊莊大隄口門刷寬一百八十餘丈水深一丈五六尺至二丈餘不等漫水由壽張鄆城等縣直穿運河東洩仍入黃河水仍南趨工段坐落上游應歸奏調南河之補用道馬開玉會同上游總辦道員沈守廉堵辦王家廟大隄口門刷寬八十餘丈水深一丈七八尺至二丈餘不等漫水由茌平禹城等縣直灌徒駭河分溜十分之一桑家渡大隄口門刷寬一百餘丈水深八九尺至二丈餘不等漫水由商河惠民等縣直灌徒駭河入海奪溜